

Madurese - Terro Alketab - Lust Scriptures

Kolowaran 15:9 Ca'epon moso, 'Oreng Isra'il se buru rowa bi' sengko' eserserra pas epega'a, dhi'-andhi'na erampasa, egi-bagiya sakanca'an. Tang peddhang eonosa, epamateyana moso epatadha'a karena.'

Kolowaran 18:21 Tape salaenna jareya ba'na kodu mele lalake'an se bicaksana, soro ngapalae oreng saebu, saratos, saeket, ban sapolo oreng. Se epele jareya kodu oreng se tako' ban ta'at ka Jehovah, ekenneng parcaya, ban ta' endha' narema go'-sogo'.

Kolowaran 20:14,17 Ja' azina. 17 Ja' terro ngala'a dhi'-andhi'na oreng; ja' terro ngala'a binena oreng, dunorra, dumbana otaba sapena, hemarra otaba apa'a bai andhi'na oreng laen."

Angkana - Etongan 11:4 Badha reng-oreng manca se abareng ban reng-oreng Isra'il e dhalem parjalanan jareya. Reng-oreng manca jareya ce' terrona ngakana daging, ban reng-oreng Isra'il molae noro' ango'ngo'an keya, oca'na, "Ja' sakenga badha se aberri' juko' daging ka sengko!"

Olangan 5:21 Ja' terro ka dhi'-andhi'na oreng laen: bengkona, tanana, binena, nor-dunorra, ebinna, hemarra otaba apa'a bai andhi'na oreng laen jareya.'

Olangan 12:20 Mon GUSTE Jehovahna ba'na la malebar tes-batessa nagarana ba'na akantha se la ejanjiyagi Salerana, ba'na olle ngakan daging sakarebba.

Olangan 22:22 Mon badha oreng lalake' tajuguk teppa'na tedhung apolong ban binena oreng laen, se kadhuwa jareya kodu eokom mate. Kalaban cara se kantha jareya ba'na matadha' kajahadan jareya.

Yusak 7:21 E antarana rang-barang se erebbu' bangsa Isra'il, abdina nengale badha juba settong se ce' bagussa, badhiyan Babilonia, jugan salaka rakerka dhu kilo, sareng emmas lantagan se berra'na langkong dhari satengnga kilo. Abdina ce' terrona se ngaandhi'a rang-barang gapaneka, daddi sareng abdina ekala', laju eerrep e dhalem tana e kemah abdina; salakana esaba' e ba-baba."

Jabur 10:3 Reng-oreng jahat asebbal parkara pangaterrona se juba', oreng se dhakka abasto sareng nolak PANGERAN.

Jabur 78:18 Reng-oreng jareya etengnget ba'-nyoba' Jehovah, maksa nyo'on kakanan se daddi pangaterrona.

Jabur 78:30 Tape napsona reng-oreng jareya tadha' marena, daddi teppa'na gi' padha terros ngakan,

Jabur 81:12(13) Daddi bi' Sengko' reng-oreng jareya epanneng paggun cengkal; dina me' olle noro' karebba atena dibi'.

Jabur 106:14 E sagara beddhi reng-oreng jareya ta' kellar ngampet napsona laju ba'-nyoba' Jehovah.

Jabur 119:36 Parenge abdidalem pangaterro kaangguy ta'at ka kom-hokommepon Junandalem, ngalangkonge pangaterro se soyiya.

Parompama'an - Bangsalan 1:19 Pajat, oreng se nyare kasap kalaban ngangguy kakerrasan bakal majara ban nyabana dibi'.

Parompama'an - Bangsalan 6:25 Ja' sampe' ba'na tagudha bi' karaddinanna, ja' kapencot bi' matana se agudha ate.

Parompama'an - Bangsalan 15:27 Sapa se nyare kaontongan se ta' halal, maancor kaliwargana dibi'. Sapa se ta' endha' ka pesse go'-sogo' bakal sennengnga odhi'na.

Parompama'an - Bangsalan 21:25,26 Oreng males se ta' endha' alalakon mate'e aba'na kalaban pangaterrona. 26 Lakona re-saare tadha' laenna, coma mekkere apa se daddi pangaterrona. Sabaligga, oreng se loros odhi'na bisa aberri' sanya'-bannya'na.

Parompama'an - Bangsalan 28:16 Pangobasa se nendhes oreng laen, ta' andhi' akkal se baras; pangobasa se baji' ka sabarang se ta' jujur bakal marenta'a sampe' ataonan.

Yesaya 56:11 Akantha pate' se dhakka se tadha' kennyangnga. Pin-pamimpin jareya ta' andhi' pangarteyan. Kabbi padha ngala' karebba dibi' ban nyare ontongnga dibi'.

Yesaya 57:17 Se mapeggel Sengko' dusa ban katama'anna reng-oreng jareya, daddi bi' Sengko' reng-oreng jareya eokom ban edina'agi. Tape reng-oreng jareya teptep cengkal ban teptep mele jalanna bi'-dibi'.

Yeremiya 6:13 Reng-oreng jareya kabbi, raja kene', padha nyare kaontongan kalaban jalan se ta' jujur. La'-mala' nabbi ban mam-imam nepo oreng keya.

Yeremiya 22:17 Namong junandalem banneyan, Yoyakim; junandalem namong nyare ontongnga dibi'. Junandalem mate'e oreng se ta' sala, ban nendhes ra'yadda epakejjem.

Yeremiya 51:13 Nagara jareya ce' sogina ban bannya' songayya, tape sateya la napa' ka ajalla.

Hizkiyel - Yehezkiel 6:9 e dhissa' reng-oreng jareya bakal odhi'a e dhalem pambuwangan. Saellana jareya reng-oreng buru bakal enga'a ka Sengko' ban bakal ngarteya ja' Sengko' ngokom ban ya-nyeya aba'na polana atena ta' esto ka Sengko'. Reng-oreng jareya adina'agi Sengko' ban mele brahala menangka gantena Sengko'. Saellana jareya reng-oreng jareya bakal ngalennyerra ka aba'na dibi' polana sakabbinna lalakon se jahat ban kotor, se la ekalako aba'na.

Hizkiyel - Yehezkiel 14:4,5 Daddi kabala ka reng-oreng jareya ja' Sengko', GUSTE Jehovah Se Mahatenggi apessen kantha reya, 'Saneyap oreng Isra'il se la parcaja ka brahala ban sampe' tabalusok ka dhalem dusa, pas entar menta petodu ka nabbi, Sengko' dibi' se aberri'a jawaban se sapantessa etarema la-brahala jareya! 5 La-brahala jareya kabbi majau

**Tang ommat dhari Sengko', tape kalaban Tang jawaban jareya moga-moga
Tang ommat abaliya pole ka Sengko'.**

Hizkiyel - Yehezkiel 22:12 Badha keya se ngala' opa'an mate'e oreng, mabudhu' pesse ban merres reng-oreng sabangsana. Reng-oreng jareya padha loppa kabbi ka Sengko'. Sengko', GUSTE Jehovah Se Mahatenggi la ngoca'.

Hizkiyel - Yehezkiel 33:31 Reng-oreng jareya dhateng anyo-ronyo, ban menangka Tang ommat reng-oreng jareya toju' ngedhingngagi cacana ba'na, tape pa-apa se eparenta'agi ba'na ta' etoro'. Bibirra acaca parkara kataresna'an, tape atena pera' mekkere kaontongan.

Hoseya 4:12 Ba'na menta petodu ka kaju sakerra! Tongket malae ba'na apa se terro ekataowana ba'na! Ba'na akantha binena oreng se daddi sondel; ba'na adina'agi Sengko', massra'agi aba' ka la'-alla'an.

Hoseya 5:4 Kajahadanna oreng Isra'il andaddiyagi reng-oreng jareya ta' bisa abali ka Jehovahna. Reng-oreng jareya la ecangkarem bi' lalakonna nyemba brahala, sampe' ta' parduli pole ka PANGERAN.

Mikha 2:2 Mon badha teggal se ekaterrowe reng-oreng jareya pas terros erampas. Mon badha bengko se ekaterrowe pas esarobot. Dhi'-andhi'na oreng sarta ana' binena padha tadha' se amana.

Nahum 3:4 Niniwe sondel rowa teppa'na eberri'i okoman. Karaddinanna ngapencot ate onggowan. Bannya' bangsa se eseher ecacae ban oca' se lemma' manes.

Habakuk 2:9 Mandar ba'na ta' salamedda! Ba'na masogi balana bi' kaontongan se ekaolle kalaban jalan se kejjem, sopaja bengkona ba'na dibi' aman ban lopot dhari kasossa'an sarta balai.

Matiyus 5:28 Tape sateya Sengko' ngoca'a ka ba'na: sapa se ngabas ka oreng babine' kalaban napso barai, oreng jareya la azina ban babine' gella' e dhalem atena.

Markus 4:19 tape oreng jareya kobater mekkere odhi'na, ban terro odhi'a mewah, napso se acem-macem maso' ka dhalem atena. Daddi kabar dhari Jehovah jareya tacecce' e dhalem atena, sampe' ta' abuwa.

Markus 7:22 azina, nepo, metenna ban ngalakone sakabbiyanna kajahadan laenna, dhakka, ta' sopan, ere atena, sompong ban ta' gampang eajar.

Lukas 3:14 Badha keya rit-parjurit se atanya, "Kadi ponapa kaula? Ponapa se kodu elakone kaula?" Dhabuna Yahya, "Ja' arampas pesse dhari sapa'a bai otabana ngarane oreng kalaban da'wa'an se palsu. Panarema atena olle gaji sabadhana!"

Lukas 12:15 Saellana jareya Isa laju adhabu ka reng-oreng se badha e jadhiya kabbi, "Senga' pate-ngate, ya, ja' sampe' ba'na reya dhakka. Sabab odhi'na manossa reya ta' targantong ka kasogiyanna, maske dhi'-andhi'na ta' sakera-kera."

Lukas 16:14 E bakto reng-oreng Farisi ngedhing pa-apa se edhabuwagi Isa jareya, Isa laju ekala'-gella', sabab reng-oreng jareya lebur ka pesse.

Yahya 8:44 Eppa'na ba'na se bendher iya areya Iblis, ban ba'na norodi karebba eppa'na. Dhari lamba' Iblis jareya tokang mate'e, ta' tao noro' ka se bendher, sabab Iblis jareya ta' andhi' barang se bendher. Mon Iblis jareya acaca lecek, jareya pantes, sabab pajat cara jareya babategga. Iblis jareya lecegan, ban asalla sakabbiyanna kalecegan.

Caretana Para Rasul 20:33 Kaula ta' oneng ngarep pesse otaba kalambi dhari pasera'a saos.

Roma 1:24-29 Daddi reng-oreng gapaneka sareng Jehovah edinggal ekobasae pangaterrona atena se bejjat, sampe' reng-oreng gapaneka alako messom sabarengngan. 25 Jehovah se lerres egante'e barang se palsu. Se esemba ban eabdi reng-oreng gapaneka banne Pancepta tape se ecepta. Mangkana Pancepta gapaneka se kodu emolja'agi salanjangnga! Amin. 26 Polana lalakonna se kadi gapaneka, manossa sareng Jehovah edinggal norodi napsona se kotor. La'-mala' babine'anna ta' kapencot ka lalake'an akantha kapprana manossa, tape kapencot ka padha babine'anna. 27 Sapaneka jugaan lalake'anna; ta' noro' kapprana ahubungan sareng babine'an, tape barai ka padha lalake'anna. Lalake'an alako barang se matodhusan sareng sasama lalake'anna, ban polana lalakon se kadi gapaneka laju padha narema babales se satembal sareng kalakowanna se jahat. 28 Sarrena manossa ta' arassa parlo andhi' pangataowan parkara Jehovah, daddi sareng Jehovah edinggal pekkeranna daddi rosak, kantos reng-oreng gapaneka ngalakone pa-ponapa se koduna ta' kengeng elakone. 29 Atena possa' sadajana pekkeran se jahat, se ta' lerres, possa' sareng katama'an, kabucco'anna ate sareng kadenggiyan; possa' sareng pangaterro mateyana oreng, atokara, nepo tor sake' ate. Reng-oreng gapaneka dujan ngacaca oreng laen,

Roma 6:12 Ja' kantos neng-enneng pole kantos dusa ngobasae odhi'na sampeyan se ta' langgeng paneka sopaja sampeyan ta' norodi pangaterrona se jahat.

Roma 7:7 Mon sapaneka, ngoca'a ponapa sampeyan sareng kaula sadaja? Ponapa ngoca'a ja' hokomma agama Yahudi paneka jahat? Tanto bunten! Nangeng hokom gapaneka se ngajari kaula parkara dusa. Kaula ta' kera oneng ponapa tama' paneka, ja' sakenga hokom ta' ngoca', "Ja' tama'."

Roma 13:9 Sabab hokomma agama Yahudi, enggi paneka: Ja' azina, ja' mate'e oreng, ja' co'-ngeco', ja' terro ngaandhi'a dhi'-andhi'na oreng laen, ganeka sareng sadajana kom-hokom laenna, ampon epapandha' daddi settong hokom saos, enggi paneka, "Taresnae sasamana ba'na akantha taresnana ba'na ka aba'na dibi".

Roma 13:14 Diggal me' olle Guste Isa Almasih se nantowagi ponapa se kodu

elakone sampeyan. Ban ja' norodi tabi'adda manossa se dusa polana norodana napso.

- 1 **Korintus 5:10,11 Se emaksottagi kaula banne oreng se cemmer otaba tama', otabana tokang tepo otaba oreng se nyemba ka brahala se ta' oneng ka Jehovah. Bunten, banne ganeka! Banne reng-oreng ganeka se emaksod kaula; sabab manabi sampeyan kodu majau dhari reng-oreng ganeka, sampeyan kodu kalowar dhari dunnya paneka. 11 Se emaksod kaula enggi paneka sampeyan ja' apolongan sareng oreng se ngako aba'na oreng Kristen, tape oreng ganeka alako ma'seyat, otabana tama', otabana nyemba brahala, otabana dujan ba'-majuba' oreng laen, otabana dujan mabu', otabana maleng. La'-mala' toju' neddha apolong sareng reng-oreng ganeka saos, ampon.**
 - 1 **Korintus 6:9,10 Sampeyan ba' onenga ja' reng-oreng se ta' atoro' ka karsana Jehovah, ta' kera daddi anggotana ommadda Jehovah? Ja' ekenneng co-koco oreng! Reng-oreng se alako ma'seyat, reng-oreng se nyemba brahala, se azina, se alako cemmer sareng oreng se padha lake'na, 10 se ngeco', se dhakka, se dujan mabu', se dujan aba'-juba'agi oreng laen, sareng se merres oreng laen -- sadajana oreng se kantha ganeka ta' kera daddi anggotana ommadda Jehovah.**
 - 1 **Korintus 10:6 Ganeka sadaja daddi conto ka sampeyan sareng kaula sadaja, kaangguy maemot sopaja sampeyan sareng kaula sadaja ta' terro ka pa-ponapa se jahat akadi bangatowa gapaneka.**
 - 1 **Korintus 12:31 Lantaran ganeka, ngereng sampeyan aehteyar pagu-onggu kaangguy ngaolle reng-paparengnga Jehovah se paleng otama. Nangeng e baba paneka kaula noduwana sampeyan jalan se paleng sae.**
 - 1 **Korintus 14:39 Daddi, tan-taretan, ngereng aehteyar kaangguy manapa' berta dhari Jehovah, nangeng ja' alarang oreng se acaca'a ngangguy acem-macem basa se ajib.**
 - 2 **Korintus 9:5 Lantaran ganeka kaula arassa parlo ngotos tan-taretan ganeka, epamangkat kaadha' kaangguy ngoros sombangan se ejanjiagi sampeyan ganeka. Kaula nyoro tan-taretan ganeka mangkat kaadha' sopaja dhaggi' mon kaula dhateng, sombanganna sampeyan ampon esadhiya'agi. Kalaban sapaneka nyata ja' paparengnga sampeyan ganeka kalowar dhari kasokanna sampeyan dibi', banne polana epaksa.**
- Galatia 5:16-20 Maksod kaula paneka: Diggal sampeyan me' olle etonton sareng Errohna Jehovah, sarengngan ja' odhi' noro' pangaterrona tabi'adda manossa. 17 Sabab pangaterrona manossa paneka tabaligga kasokanna Erroh Jehovah, dineng kasokanna Erroh Jehovah tabaligga pangaterrona manossa. Se dhadhuwa' ganeka ta' cocok, daddi sampeyan ta' bisa ngalakone pa-ponapa se ekaterro. 18 Nangeng mon sampeyan etonton Errohna Jehovah, sampeyan ta' kera ekobasae hokomma agama. 19**

Pangaterrona tabi'adda manossa nyata e dhalem kon-lalakon ma'seyat, se cemmer kotor ban ta' patot; 20 e dhalem nyemba ka brahala ban elmo wa'-duwa'; so-mosowan, atokaran, tamburuwan, lekkas peggel ban ngotama'agi aba'na dibi'; aca-pecca ban aha'-piha';

Galatia 5:24 Reng-oreng se ampon daddi kaagunganna Isa Almasih, ampon mate'e sadajana tabi'at manossana sareng sadajana napso ban pangaterrona.

Efesus 2:1-3 Lamba' sampeyan sacara rohani ampon seda sabab sampeyan dusa sareng ta' ngestowagi kon-papakonna Jehovah. 2 E bakto ganeka sampeyan noro' ka sadajana kabiyasa'anna dunnya paneka; artena sampeyan atoro' ka pangobasana langnge', enggi paneka eroh se samangken ngobasae atena reng-oreng se ta' ngestowagi papakonna Jehovah. 3 Gi' dhimen sampeyan sareng kaula sadaja padha saos sareng reng-oreng ganeka, odhi' norodi tabi'adda manossa e dhalem aba' paneka sareng ngalakone pa-ponapa se masenneng badan sareng pekkeran. E bakto ganeka sampeyan sareng kaula paneka reng-oreng se ekenneng babendunna Jehovah, padha akadi reng-oreng laenna.

Efesus 4:19 Reng-oreng ganeka ampon ta' gadhuwan ate todhus pole, kantos norodi sadajana napsona, sarengngan odhi' cemmer sakarebba.

Efesus 4:22-27 Daddi, dinggallagi manossa se laju sareng cara odhi'na se laju se eparosak sareng sadajana pangaterrona se ngeba oreng ka jalan se kalero. 23 Ate sareng pekkeranna sampeyan kodu epaanyar. 24 Ban sampeyan kodu odhi' daddi manossa se anyar se ecepta'agi menorot gambaranna Jehovah, enggi paneka kalaban tabi'at se lerres, loros sareng socce. 25 Daddi, tan-taretan sadaja, sampeyan ja' lecegan pole; pajujur se settong ka settongnga; sabab sampeyan sadaja padha bagiyanna badanna Almasih. 26 Mon sampeyan peggel, ja' sampe' sampeyan dusa polana kapeggellanna ganeka. Ja' ros-terrosan peggel saare benteng, 27 sopaja Iblis ta' olle kasempadan.

Efesus 5:3,5 Sampeyan paneka ommadda Jehovah. Daddi, kon-lalakon ma'seyat, sareng se ta' patot, otabana dhakka, ta' pantes badha e antarana sampeyan. Ja' sampe' oreng laen gadhuwan marga ngoca' ja' sampeyan atengka kadi ganeka. 5 Tetene, gi: Oreng se lalakonna cemmer otaba ta' patot, otaba dhakka, (lalakon ganeka padha saos sareng nyemba ka brahala), oreng ganeka ta' bisa daddi anggotana ommat se eparenta Almasih sareng Jehovah.

Kolose 3:5 Daddi tore pamate sadajana pangaterro ka sadajana se e dunnya paneka, se ngobasane sampeyan, akadi lalakon ma'seyat, lalakon se ta' patot, napso juba', pangaterro se jahat, sareng dhakka (sabab dhakka paneka padha sareng nyemba brahala).

1 Tesalonika 2:5 Sampeyan ampon oneng ja' kaula sadaja ta' oneng nes-

mamanes bibir otabana co-ngoco sampeyan sopaja kengenga notobi maksod tama'. Jehovah sakseepon!

- 1 **Tesalonika 4:3-7** Kasokanna Jehovah enggi paneka sopaja sampeyan odhi'a socce sareng ajauwi sadajana lalakon ma'seyat. 4 Saneyap oreng lalake' e antarana sampeyan kodu oneng kadi ponapa koduna odhi' sareng rajina kalaban cara se ekasokane Jehovah sareng masenneng panggaliyanna Jehovah sarta manossa. 5 Ja' odhi' norodi pangaterrona napso ka rajina akadi reng-oreng se ta' oneng ka Jehovah. 6 E dhalem parkara se kadi ganeka, ja' kantos badha oreng se la-nyala otaba co-ngoco sataretanan. Gi' dhimen kaula sadaja ampon maenga' epakerras ka sampeyan, ja' Pangeran bakal ngokoma reng-oreng se abadhi kasala'an-kasala'an se sapaneka. 7 Sampeyan sareng kaula etembali Jehovah sopaja odhi'a kalaban cara se masenneng panggaliyanna, banne sopaja odhi'a cemmer.
- 1 **Timotiyus 3:3,8** banne oreng se dujan mabu' otabana se dujan atokar. Sabaligga kodu alos ban ta' endha' atokaran. Ta' olle se-pesseyan. 8 Bariya keya reng-oreng se abanto jema'at kodu oreng se bagus babategga ban berse atena; ta' olle se-pesseyan ban ta' olle bannya' ngenom anggur.
- 1 **Timotiyus 6:9,10** Tape oreng se terro sogiya, tagudha ban tajira' bi' acem-macem pangaterro se budhu ban se marosagan. Pangaterro-pangaterro jareya bisa andaddiyagi oreng ancor ban calaka'. 10 Sabab lebur ka pesse reya daddi somberra sakabbiyanna kajahadan. Badha oreng se aburu pesse sampe' ta' endha' pole neggu'i pangajaran Kristen, ban oreng jareya laju ekenneng kasangsara'an sabannya'na sampe' ancor atena.
- 2 **Timotiyus 2:22** Jauwi kasennengngan-kasennengnganna ngangodhadan. Ehteyarragi odhi' noro' kasokanna Jehovah, ngestowagi pangajaranna ban taresna ka sasama, sarta taremtem atena. Ehteyarragi odhi' kantha jareya ban reng-oreng se aserro nyo'on partolonganna Pangeran ban ate se morne.
- 2 **Timotiyus 3:2,6** Manossa bakal ngotama'agiya aba'na dibi', amata pesse, angga' ban dujan asebbal. Dujan ya-nyeya oreng, alaban ka oreng towana, ta' tao sakalangkong ban ta' endha' ka barang se asepat rohani. 6 Badha e antarana reng-oreng se kantha jareya se la nyosop ka kobengkona oreng, pas makapencot atena babine'an se ta' kowat se ce' bannya'na dusana ban se ekobasae pangaterrona se acem-macem.
- 2 **Timotiyus 4:3** Sabab bakal napa'a baktona oreng ta' endha' pole ngedhingngagi pangajaran se teppa'. Sabaligga, reng-oreng jareya bakal norodana pangaterrona dibi', ban makompola guru sabannya'na me' olle ngajarragi barang se nyaman kaedhinganna ka kopengnga dibi'.

Titus 2:12 Rahmadda Jehovah jareya ngajarragi ka sengko' ban ba'na sopaja ta' nerrossagi odhi' kalaban cara tabaligga se ekasokane Jehovah, ban ta'

norodi pangaterro se dhari dunnya reya. Sengko' ban ba'na eajari sopaja odhi' e dunnya reya tao ngampet napsona ate, berse atena ban esto ka Jehovah.

Titus 3:3 Sabab sabbanna sengko' ban ba'na kabbi reya budhu keya, padha nyaleyot ban ta' atoro' oca'. Sengko' ban ba'na kabbi padha ekobasae acem-macem napso ban pangaterro; possa' ban neyat se hat-jahat ban ere atena, sarta saleng baji'.

Ibrani 13:5 Ja' sampe' odhi'na sampeyan ekobasae pekkeran lebur ka pesse, nangeng panarema sareng ponapa se ekaandhi' sampeyan. Sabab Jehovah ampon adhabu, "Bi' Sengko' ba'na ta' edina'a ban ta' edina'agiya."

Yakobus 1:14,15 Nangeng oreng tagudha manabi tanoro' sareng tagiyur sareng pangaterrona dibi' se jahat. 15 Saamponna ganeka, manabi pangaterro se jahat ganeka etorodi, laju daddi dusa; dineng dusa, manabi ampon mateng, laju madhateng pate.

Yakobus 4:1-5 Dhari ka'imma asalla keket sareng tokar e antarana sampeyan? Asalla gu ta' dhari pangaterro-pangaterro se terros saos aperrang e dhalem aba' paneka kaangguy nyare kasennengangan e dunnya? 2 Sampeyan terro, tape ta' bisa ngaolle, daddi sampeyan pas mateyana oreng! Sampeyan samangat, tape ta' ahasel ngaolle se ekaterrowe, sampeyan laju atokar ban akeket. Sampeyan ta' olle pa-ponapa, sabab ta' nyo'on ka Jehovah. 3 Ban sanare sampeyan nyo'on, sampeyan ta' kera eparenge, sabab tojjuwanna parmenta'anna sampeyan juba'; se epenta sampeyan pera' kaangguy kapentinganna dibi'. 4 Sampeyan oreng se ta' esto! Sampeyan ba' onenga ja' mon sampeyan akanca sareng dunnya sampeyan daddi mosona Jehovah? 5 Sampeyan ja' ngera Alketab tadha' dhasarra nyebbuttagi, "E dhalem manossa Jehovah mamaso' erroh se kerras pangaterrona."

1 Petrus 1:14 Pata'at ka Jehovah, ban ja' odhi' norodi pangaterrona sampeyan se lamba', e bakto sampeyan gi' ta' oneng ka Jehovah.

1 Petrus 2:11 Tan-taretan sadaja, sampeyan paneka oreng manca e dunnya paneka. Daddi kaula nyo'ona gu-onggua ka sampeyan, ja' norodi napsona manossa se ros-terrosan aperrang sareng sokma.

1 Petrus 4:2-4 Daddi, dhari samangken sampeyan kodu odhi' e dunnya paneka menorot kasokanna Jehovah, banne menorot pangaterrona manossa. 3 Gi' dhimen sampeyan ampon cokop abit ngalakone pa-ponapa se biyasana elakone reng-oreng se ta' oneng ka Pangeran. Odhi'na sampeyan ta' sae. Sampeyan norodi napso, bu'-mabu'an, ata-pesta, nom-enoman, nyemba brahala kalaban cara se majitjit. 4 Samangken oreng se ta' oneng ka Pangeran padha heran polana sampeyan ta' noro' odhi' akadi reng-oreng ganeka, se ane'madi dusa ta' abates. Daddi reng-oreng ganeka ya-nyeya sampeyan.

- 2 Petrus 1:4** Kalaban cara se sapaneka Jehovah marenge sampeyan sareng kaula sadaja kat-berkat se talebat raja sareng se talebat arga se ampon ejanjiyagi Salerana. Kalaban kat-berkat paneka sampeyan bisa lopot dhari pekkeran se hat-jahat se marosak dunnya paneka; ban sampeyan bisa noro' narema pat-sepat se illahi.
- 2 Petrus 2:3** Sarrena dhakka, ru-guru palsu ganeka bakal nyareta'agiya ka sampeyan ngeng-dungngeng gabayan kaangguy nyare ontong dhari sampeyan. Tape pangadilan se ngokoma reng-oreng ganeka ampon abit esadhiya'agi, ban katebasan se ampon etantowagi kaangguy reng-oreng ganeka ampon anante'.
- 2 Petrus 2:9-19** Daddi Pangeran ngagali kadi ponapa carana masalamedda reng-oreng se ngestowagi dhabuna mon reng-oreng ganeka ngadhebbi bacoba. Ban Pangeran ngagali kadi ponapa carana nyoba' reng-oreng se jahat kaangguy eseksa e Are Pangadilan, 10 kong-langkong reng-oreng se norodi napsona se kotor sareng ya-nyeya ka kakobasa'anna Jehovah. Ru-guru se palsu paneka talebat bangalla sareng talebat sombongnga kantos ta' sengka ya-nyeya para mahlok se molja e sowarga! 11 Mangkana, kat-malaekat saos, se lebbi kowat sareng lebbi kobasa dhari ru-guru palsu ganeka, ta' ngarane lok-mahlok e sowarga ganeka sareng ca'-oca' se ya-nyeya e ajunanna Pangeran. 12 Tape ru-guru palsu ganeka, ce' talebadda! Akadi burun alas se lahir pera' kaangguy etangkebba ban epateyana. Ta' apekker, sabarang lalakonna pera' adhasar ka gulina atena malolo. Daddi sabarang se ta' epahame pekkeranna eserrang bi' ca'-oca' se ya-nyeya. Daddi reng-oreng ganeka polana tengkana dibi' bakal tompessa akadi burun alas. 13 Bakal nanggunga sangsara menangka ganjaranna kasangsara'an se etanggung reng-oreng laen lantaran lalakonna aba'na. Se ekasennengnge reng-oreng ganeka enggi paneka ngalakone ponapa'a saos e baja seyang kaangguy norodi pangaterrona badanna. Mon apolong alenggi sareng sampeyan e bakto adha'ar, pannengnga reng-oreng ganeka mangalennyerran lantaran mabu' sareng napsona. 14 Tadha' busenna agabay dusa. Se ekaleburi tadha' laen kajabana ngabas babine'an se cemmer odhi'na. Reng-oreng se gi' buru parcaja sareng gi' korang yakin, ecacae sampe' tagiyur. Atena ampon biyasa dhakka. Ru-guru ganeka reng-oreng se ebasto Jehovah! 15 Sarrena ta' poron lebat jalan se loros, dhibudhina nyaleyot. Se etoro' jalanna Bileyam ana'na Beyor gi' jaman lamba' ka'issa', se terro kengenga pesse dhari lalakonna se jahat. 16 Tape eparenge parengeddan se kerras polana kajahadanna ganeka sareng Jehovah; hemarra acaca asowara manossa sareng maambu nabbi ganeka ajalannagi lalakonna se gila. 17 Ru-guru palsu ganeka akadi somber se kerreng, akadi ondhem se egiba angen barat. Reng-oreng ganeka sareng Jehovah ampon esadhiyai kennengngan se paleng petteng. 18 Dujan

acaca se gi-tenggi tape tadha' essen; napso se cemmer eangguy nyelreddagi reng-oreng se gi' buru kalowar dhari kompolanna reng-oreng se nyaleyot odhi'na. 19 Ru-guru palsu ganeka ajanjiyagi kamardika'an ka reng-oreng ganeka, mangkana reng-oreng ganeka ekadunor kabiysa'an-kabiysa'an se marosak manossa. Sabab mon badha se makala oreng, oreng ganeka ekadunor se makala.

2 Petrus 3:3 Nomer settong, sampeyan kodu oneng ja' e re-are se dhi-budhina bakal badha'a reng-oreng se odhi'na ekobasae napsona. Reng-oreng ganeka bakal bi-nyebbiya sampeyan,

1 Yahya 2:15-17 Ja' lebur ka dunnya paneka, otaba ka ponapa'a bai se badha e dunnya paneka. Mon sampeyan lebur ka dunnya paneka, sampeyan ta' taresna ka Rama. 16 Sadaja se badha e dunnya paneka -- se ekaterrowe tabi'adda manossa se dusa, se etangale pas ekaterro sarta edir-edirragi -- ganeka sadaja banne dhari Rama asalla, tape dhari dunnya. 17 Dunnya se sadajana essenka ekaterrowe manossa, bakal duliya mosna. Nangeng oreng se norodi kasokanna Jehovah, teptep odhi' salanjangnga.

Yudas 1:11 Palang reng-oreng ganeka! Reng-oreng ganeka noro' jalan se elebadi Kain. Polana terro olleya pesse, reng-oreng ganeka nyono' ka cellot se budhuk, padha sareng Bileyam. Ban reng-oreng ganeka juga epaancor polana aberonta' akadi Korah.

Yudas 1:15-19 kaangguy ahakime sakabbiyanna oreng. Pangeran ngokoma reng-oreng jahat polana kon-lalakonna se bejjat. Ban Salerana ngokoma oreng se dusa ban daraka polana ca'-oca' panyeya'an se kalowar dhari bibirra." 16 Reng-oreng ganeka ros-terrosan aseddhian ban nyala'agi oreng laen; odhi' menorot pangaterro-pangaterrona se dusa. Asebbal parkara aba'na dibi', ban ajilat oreng polana terro nyareya kaontongan. 17 Nangeng tan-taretan se kakase, kaemodi pa-ponapa se gi' dhimen edhabuwagi sul-rasulla Goste Isa Almasih. 18 Sul-rasul ganeka apareng oneng kaadha' ka sampeyan ja' mon para' aher jaman bakal badha'a reng-oreng se bi-nyebbi sampeyan, enggi paneka reng-oreng se odhi' menorot pangaterro-pangaterrona se dusa. 19 Reng-oreng ganeka se daddi sababba oreng aca-pecca. Reng-oreng ganeka ta' ekobasae Errohna Jehovah, nangeng ekobasae pangaterro-pangaterrona tabi'at se dhari dunnya.

Wahyu 18:14 Para sodagar ngoca' ka babine' ganeka, "Pa-apa se terro ekaandhi'a ba'na la tadha', ban sakabbiyanna kamewahanna ban kataremtemmanna ba'na la elang. Ba'na ta' kera nemmo pole!"